

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 78 (1993)
Heft: 5

Artikel: Giuventetgna disoccupada
Autor: Lombriser, Patrc
DOI: <https://doi.org/10.5169/seals-882638>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 06.05.2025

ETH-Bibliothek Zürich, E-Periodica, <https://www.e-periodica.ch>

Giuventetgna disoccupada



Patric Lombriser

Igl atun 1990 dat ei tuttenina pli bia disoccupai che plazzas libras en Svizra. La fin 1991 ein 40'000 ed in onn pli tard ein schizun 92'000 persunas senza lavur. Oz munta la cefra da disoccupai a varga 160'000 ni 4,6%. Tier ils giuvenils denter 20 e 24 onns ei la quota, cun 5,7%, la pli aulta. Ils emprems ch'ei vegni relaschai ein luvvers cun plazzas parcialas, luvvers nunscolai, dunnas e jasters.

La pressa rapporta pil solit «objectivamein» dalla disoccupaziun. Ils artechels cuntegnan bein cefras, teorias e statisticas, denton negins sentiments. Ils problems dils disoccupai vegnan zuppentai.

Mia disoccupaziun

Giuvens e giuvnas che fineschan igl emprendissadi ni la scola han da sbatter cun la disoccupaziun. Ils inserats ch'enquoran luvvers fan pretensiuns che tals che han gest finiu igl emprendissadi san mai e pli mai porscher. Per exempel vegn ei pretendiu entuorn tschun onns practica ed ina vegliadetgna da 25 tochen 30 onns, pretensiuns ch'jeu ed aunc biars auters san buca offerir.

Suenter haver fatg il diplom dad ina scola media mercantila, sundel semess en ad encurir ina plazza, denton senza success. Ils inserats da plazzas pretendan adina entgins onns practica. Quella sai jeu, aschi bugen sco jeu less, buca offerir. Ils onns che las fatschentas investavan ed engrondevan eran absolvents da scolas mercantilas pli tschercai. Oz prefereschan quellas tals che han fatg in emprendissadi mercantil e che han gia empau practica.

Aschia retscheivel jeu ina abdicaziun suenter l'autra, pil pli treis jamnas suenter mia annunzia. Era sch'jeu hai gia quintau cun ina abdicaziun eis ei tuttina mintga gada in trest eveniment cura che mias supposiziuns capetan per propi. Las

abdicaziuns denton ein differentas, las inas tuccan pli fetg che las autras. Fertion che las inas espriman sincers sentiments da cumpassiun, ein autras formuladas cuort e bein, senza negina perstgisa.

Suenter mintg'abdicaziun ha ei puspei num seprender ensemen e semetter danovamein alla tscherca. Cun quei ch'jeu sundel plitost in optimist damognel jeu dètg bein quella situaziun. Forsa era perquei ch'jeu enquerel mia emprema piazza. Per disoccupai che han gia luvrau e fadigiau plirs onns ei quei segiramein in bien ton pli grev. Grevadetgnas ed autras malsognas psichicas sereghegian, gnanc da tschintschar dalla malcuntentientscha e dalla sminuaziun dall'atgna valeta. Buca mo il disoccupau pitescha, mobein l'entira famiglia e siu ambient.

Il senn dalla veta sminuescha ed il disoccupau sa buca tgei trafficar cun siu temps. Con bugen vess el giu inagada aschi ditg liber, ussa denton porta quei nuot ad el. Il temps da disoccupaziun ei tut auter che far vacanzas! Da differentas varts hai jeu stuiiu udir la remarca: «Sch'jeu vess buca lavur e mass a bullar, jeu fagess lu quei ed jeu fagess lu tschei...» Quels che tschontschan taluisa han denton pauca idea dalla situaziun dils disoccupai. Il temps da disoccupaziun porscha negina satisfacziun, anzi il cuntrari. En lur disparaziun enqueran ils disoccupai in esch per sortir. Savens arvan els denton il falliu ed enqueran confiart egl alcohol, cun magliar, fimar, ni ellas drogas, el mender cass emprova il disoccupau schizun da fugir da ses problems cun in suicid.

Las buccas nauschas

In grond problem dil disoccupau ei siu contuorn, las buccas nauschas. Adina puspei vegn el mudergiaus da remarcas sco: «Quei toc smarschun leu che va a bullar; quel ei mo memia bials da far tschuff la detta ...» Ils disoccupai porschan silmeins material avunda per ils paterluns e las paterlunas. Ei fa denton vegnir vietis che quels ein buca pipa da dir lur meini en fatscha als pertuccai. Ad ins sez vegnan talas tschontschas ad ureglia pér cu quellas han gia fatg la curella per gl'entir vischinadi. Da tals schabetgs denton emprendan ins d'enconuscher la glied. Per mei ei la famiglia, siu sustegn e sia consolaziun, fetg impurtonta en mia situaziun. Jeu hai era udiu dad auters cass, nua ch'il disoccupau vegn buca sustenius dalla famiglia, mobein aunc mess sut pressiun. Secapescha ch'ei tonscha buca mo cugl agid dalla famiglia. La persuna principala sundel jeu. Sch'jeu survegnel in'abdicaziun stos jeu far curascha a memez e buca schar pender. Quei ei ina conseguenza positiva da mia disoccupaziun. Jeu hai empriu d'enconuscher memez, da saver sefidar da memez, da saver sligiar problems senza esser dependents dad auters. Duront la scola vevel jeu adina in cert schurmetg, seigi quei dil rectur, dils scolasts e scolastas sco era dils collegas, ussa sundel jeu persuls.

En discuors vegn ei adina puspei pretendiu che la giuventetgna disoccupada vessi da secuntentar dallas plazzas da lavur ch'ei avon maun. Sch'jeu hai denton fatg ina scolaziun commerciala, hai jeu negin interess da luvrar en in'otra clamada. Era jeu hai fatg mes plans pil futur, denter auter da saver far aschi spert sco pusseivel entgins onns practica e da saver sescolar vinavon. Jeu hai aunc massa ideas ch'jeu vuless realisar en mia clamada. Il mument spetgel jeu mo aunc sil segn da partenza.

Lavur da pionier

Il cantun Grischun, ensemen cun aunc auters cantuns, ha demussau spert da pionier en vesta alla disoccupaziun dalla giuventetgna. A giuvens e giuvnas senza lavur eis ei vegniu dau la pusseivladad da far in practicum da sis meins per saver rimnar empremas experientschas ella clamada. Las fatschentas che prendan practicants pagan circa ina tiarza dad ina paga fixa, il rest vegn finanziaus dalla cassa da disoccupaziun. L'idea ei buna. Il cantun stuess mo animar dapli fatschentas da porscher quella pusseivladad da far in practicum. Grondas fatschentas, bancas e segiradas ein strusch d'anflar sin la gliesta da practicum.